



Polling

जम्मू-कश्मीर च अज्ज त्रीये ते अखीरले गेड़ दे असैम्बली चुनाएं दरान पैहले च'ऊं घैंटें दरान 28 इशारिया 12 फीसद मतदान दर्ज कीता गेआ ऐ। आकाशवाणी दे जम्मू संवाददाता दी रिपोर्ट मुजब, तकरीबन सब्बनें मतदान केन्द्रें पर लोकें दिआं लम्मियां-लम्मियां रींगां दिक्खने गी लब्बै करदिआं न। प्रदेश दे 7एं जिलें दे 40 असैम्बली हलकें च अज्ज 5 ज्हार 60 मतदान केन्द्रें पर मतदान बड्डलै 7 बजे शुरु होई गेआ हा। इनें जिलें च जम्मू संभाग दे जम्मू, कठुआ, सांबा ते उधमपुर जिले ते कश्मीर घाटी दे कुपवाड़ा, बारामूला ते बांडीपोरा जिले शामिल न। चुनां आयोग आसेआ सब्बनें मतदान केन्द्रें पर सुरक्षा सने होर दुए लोडचदे बंदोबस्त जिआं बिजली, पानी, साफ-सफाई, शौचालय, शैड वगैरा दी दस्तयाबी जकीनी बनाई गेदी ऐ। एह्दे अलावा लोडमंदें गी व्हील चेयर दी सुविधा बी उपलब्ध करोआई जा करदी ऐ। आकाशवाणी दे जम्मू जिला संवाददाता 85एं ब'रें दी मतदाता विमला देवी हुंदे नै गल्लबात कीती। उनें गलाया.....



Voting

जम्मू-कश्मीर दे 7एं जिलें दिएं 40 असैम्बली सीटें लेई अज्ज बड्डलै 7 बजे थमां वोट पुआए जा करदे न। उधमपुर-कठुआ लोकसभा हलके थमां सांसद ते केन्द्री मंत्री जतिन्द्र सिंह होरें अपने परोआर दे सदस्यें कन्नै वोट पाया ते आखेआ जे असैम्बली चुनाएं च लोकें दी जोश भरोची शमूलियत, प्रधानमंत्री नरेन्द्र मोदी हुंदी नीतिएं दी कामयाबी गी दर्शादी ऐ। उनें नेशनल कांफ्रेंस ते कांग्रेस दिएं पैहलकी सरकारें दी निंदेआ करदे होई आखेआ जे उनें दफा 370 दा माड़ा इस्तेमाल करदे होई पच्छमी पाकिस्तानी रिफ्यूजिएं, वाल्मीकि समाज ते गोरखा समुदाय गी उंदे नागरिकता ते मतदान दे अधिकारें थमां वंचित रक्खेआ। सिंह होर उधमपुर संसदी हलके दी नुमाइंदगी करदे न ते ओह् अज्ज बड्डलै त्रिकुटा नगर आहले मतदान केन्द्र पर वोट पाने परैन्त पत्रकारें कन्नै गल्ल करै करदे हे।



Gh. Nabi Azad

साबका मुख्यमंत्री ते डेमोक्रेटिक प्रोग्रेसिव आजाद पार्टी दे प्रधान गुलाम नबी आजाद होरें बी अज्ज जम्मू च मतदान कीता। वोट पाने परैन्त पत्रकारें कन्नै गल्ल करदे होई आजाद होरें सब्बनें मतदाताएं गी अपील कीती जे ओह सने परोआर मतदान केन्द्र पर जाइयै वोट पाने दे अपने हक्के दा इस्तेमाल करन। उनें आखेआ जे अज्ज बेरोजगारी सब्बनें शा बड्डा मसला ऐ ते एह छड़ा नौजवानें दा गै नेई पूरे समाज दा मसला ऐ। उनें आखेआ जे पिच्छले केई ब'रें थमां बेरोजगारी गी दूर करने लेई कोई बी योजना यां कार्यक्रम नेइ बनाया गोआ ऐ। उनें आखेआ जे चुनां, मसलें पर लड़े जंदे न पर कोई बी लोकें दे मसलें गी नेई पुट्टदा। उनें आखेआ जे जम्मू-कश्मीर दे लोक जिसी वोट देखन उयै अगली सरकार बनाग।

<><><><><><>

Sham Lal Sharma

साबका मंत्री ते जम्मू नार्थ असैम्बली हलके थमां बीजेपी दे मेदवार शाम लाल शर्मा होरें आखेआ ऐ जे चुनां, लोकतंत्र दा सब्बनें शा बड्डा उत्सव हुंदे न। मतदान केन्द्रें दे बाहर लोकें दिआं लम्भियां-लम्भियां रीगां इस गल्लै दा सबूत न जे लोक जम्मू-कश्मीर च बदलाव चांहुंदे न। उनें भरोसा जताया जे जम्मू संभाग दिएं जेहड़ो 24 सीटें पर अज्ज वोट पाए जा करदे न उत्थे मतदान दी प्रतिशत पिच्छले केई ब'रें दे रिकार्ड त्रोड़ी देग। उनें मतदाताएं गी अपील कीती जे ओह सब्बनें शा बधिया मेदवारें गी गै चुनन।

<><><><><><>

Yogesh Sawhney

साबका मंत्री ते जम्मू ईस्ट हलके थमां कांग्रेस पार्टी दे मेदवार योगेश साहनी होरें आखेआ ऐ जे अज्ज होआ करदे मतदान च लोकतंत्र दी जित्त होग ते लोक, पिच्छले 10एं ब'रें थमां बीजेपी आसेआ कीते गोदे जुल्में-ज्यादतिएं दा बदला अज्ज अपने वोटें दे राहें लैडन। उनें आखेआ जे कांग्रेस पार्टी एह नेई आखदी जे ओह दफा 370 गी आहन्नग पर उंदी मंग एह ऐ जे जम्मू दे नौजवानें गी नौकरियां मिलनियां चाईदिआं ते उंदियां जमीनां बी सुरक्षित होनियां चाईदिआं। साहनी होरें आखेआ जे जम्मू-कश्मीर दा राज्य दा दर्जा ब्हाल होना लोडचदा ऐ। उनें लोकें गी अपील कीती जे ओह घरें पर नई बौहन सगुआं सने परोआर जाइयै पक्क गै वोट पान।

<><><><><><>

Kavinder Gupta(byte)

साबका उपमुख्यमंत्री ते बीजेपी दे नेता कविंदर गुप्ता होरें आखेआ ऐ जे जम्मू-कश्मीर च 10एं बरें दे वकफे परैन्त विधानसभा दे चुनांS होआ करदे न ते इनें'गी लेइयै लोकें अंदर बड़ा मता उत्साह ऐ। उनें आखेआ जे लोकें लोकतंत्र च अपना गैहरा विश्वास जताया ऐ इसकरियै उनें'गी मेद ऐ जे अगली सरकार, लोकतंत्र ते बीजेपी दे पक्ख च बनोग। उनें आखेआ.....

<><><><><><>

Valmiki (byte)

जम्मू-कश्मीर च असैम्बली चुनाएं च पैहलो बारी वोट पाइयै वाल्मीकि समाज ते गोरखा समुदाय दे लोकें अंदर मती खुशी ऐ। इनें समुदायें सने पच्छमी पाकिस्तान दे रिफ्यूजी बी दफा 370 ते 35-ए हटने दे बाद वोट पाने दे हकदार बने न। पिच्छले 67एं बरें च नेया पैहली बारी ऐ जिसलै वाल्मीकि समाज ते गोरखा समाज दे लोकें गी वोट पाने ते पेशेवर कोर्से तोड़ी पुज्ज दा हक मिलेआ ऐ। हासल आंकडें मुजब, जम्मू च वाल्मीकि परोआरें दे साड्ढे 6 ज्हार लोक ते तकरीबन 900 गोरखा परोआर वोट पाने दे हकदार न ते इनें चुनाएं च इंदी भूमिका बी बड़ी महत्वै आहली ऐ। वाल्मीकि समाज दे प्रधान गारू भट्टी होरें आकाशवाणी कन्नै खास गल्लबात करदे होई आखेआ

....

<><><><><><>

Women Candidates

जम्मू-कश्मीर च अज्ज त्रीये गेड़ दे चुनां लेई 28 महिला मेदवार चुनांS मैदान च न। इंदे चा 14 महिलां मेदवार जम्मू संभाग ते 14 गै कश्मीर घाटी थमां न। जम्मू संभाग दिएं इनें महिला मेदवारें च रामनगर थमां पैथर्स पार्टी दिआं अशरी देवी, बनी थमां कांग्रेस दिआं काजल, कटुआ थमां आजाद मेदवार खुशबू भगत, जम्मू नार्थ थमां सुनीता तुर्की, सुचेतगढ़ थमां उशा देवी, आर.एस. पुरा जम्मू साउथ थमां पवनीत कौर, चनैनी थमां गीता मन्हास, सुचेतगढ़ थमां डाक्टर प्रीति कुमारी, जम्मू वेस्ट थमां शिक्षा बन्दाल, उधमपुर वेस्ट थमां सुलक्षणा खजूरिया, सांबा थमां रीना चौधरी ते जम्मू नार्थ थमां प्रियंका शर्मा शामिल न।

<><><><><><>

CEC Appeal

जम्मू कश्मीर च त्रीए गेड़ दे असैंबली चुनाएं गी दिक्खदे होई मुख चुनां आयुक्त राजीव कुमार होरें मतदाताएं गी अपील कीती ऐ जे ओह बधी-चढ़ियै मतदान करन। कुमार होरें आखेआ जे जम्मू कश्मीर च मतदान दी प्रतिशत, मेदवारें दी गिनतरी ते प्रचार सब्बनें च गै बाद्धा दर्ज कीता गेआ ऐ। उनें आखेआ जे पैहले ते दुए गेड़ दे मतदान दरान बहिश्कार जां परतियै मतदान दा कोई मामला सामने नेई आया। उनें आखेआ जे अजें तगर होए दे मतदान दा प्रतिशत ऐतिहासक रेआ ऐ ते अस समाज दे हर तबके गी अपील करने आं जे ओह अज्ज बधी-चढ़ियै मतदान करन।

<><><><><><>

Modi Message

प्रधानमंत्री नरेन्द्र मोदी होरें मतदाताएं गी अपील कीती ऐ जे ओह जम्मू-कश्मीर च अज्ज त्रीये ते अखीरले गेड़ दे असैंबली चुनाएं च वोट पाने दे अपने हक्कै दा इस्तेमाल पक्क गै करन। सोशल मीडिय मंच एक्स पर जारी इक स्नेह च मोदी होरें आखेआ ऐ जे अज्ज जम्मू-कश्मीर च त्रीये ते अखीरले गेड़ तैहत वोट पुआए जा करदे न। उनें लोकें गी गुजारिश कीती ऐ जे ओह अग्गे औन ते लोकतंत्र दे इस उत्सव दी कामयाबी लेई पक्क गै मतदान करन। उनें विश्वास जाहर कीता जे नौजवानें ते पैहली बारी वोट पाने आहले मतदाताएं दे कन्नो-कन्नी महिला शक्ति बी अज्ज बधी-चढ़ियै मतदान करोग।

<><><><><><>

Amit Shah

केन्द्री गृह मंत्री अमित शाह होरें जोर देइयै आखेआ ऐ जे जम्मू-कश्मीर च इक ऐसी सरकार दी लोड़ ऐ जेहड़ी खित्ते दी सुरक्षा, रमानदारी ते स्थिरता लेई नतीजाकुन फैसले लैने दी समर्थ रक्खदी होऐ। उनें गलाया जे जम्मू-कश्मीर गी ऐसी दूरदर्शी सरकार चाईदी ऐ जेहड़ी मजबूत फैसले लैने च सक्षम होऐ। उनें लोकें गी अपील कीती जे ओह जम्मू-कश्मीर च सैलसफा, शिक्षा, रोजगार ते पूरे-पराते विकास आहले ऐतिहासिक बदलाव लेई पक्क गै मतदान करन।

<><><><><><>

Rahul Gandhi

लोकसभा च विपक्ष दे नेता ते कांग्रेस पार्टी दे साबका राष्ट्रीय प्रधान राहुल गांधी होरें बी जम्मू कश्मीर दे मतदाताएं गी अपील कीती ऐ जे ओह घरा बाहर आन ते बद्ध कोला बद्ध गिनतरी च वोट पान। उनें आखेआ जे लोकें आस्सेआ पाया गेदा इक-इक वोट जम्मू दा भविक्ख तैह करोग ते लोकें दे अधिकारें गी होर ताकत देग।

<><><><><><>

